



Santuari kelah menjadi antara destinasi tumpuan utama pelancong ke Tasik Kenyir.

(FOTO HIASAN)

Santuari Kelah Tasik Kenyir terima anugerah emas

11/12/2021 m/s: 32 BERITA HARIAN

**Program biak ikan
diiktiraf bagi
kategori Inisiatif
Ekopelancongan
Terbaik MTC**

Kuala Terengganu: Santuari Kelah di Tasik Kenyir, Hulu Terengganu menerima Anugerah Emas Majlis Pelancongan Malaysia (MTC) 2021.

Pengurus Besar Lembaga Kemajuan Terengganu Tengah (KETENGAH), Tengku Ahmad Nadzri Tengku Musa, berkata santuari kelah di Tasik Kenyir dinobatkan sebagai penerima anugerah bagi kategori Inisiatif Ekopelancongan Terbaik dalam majlis anjuran MTC di Petaling Jaya, kelmarin.

Santuari kelah pada asalnya dibangunkan untuk memulihara

dan menggalakkan pembiakan ikan kelah liar di habitat semula jadi agar menjadi antara produk pelancongan di Terengganu.

“Menyedari kepentingan untuk mengekalkan spesies ikan asal Tasik Kenyir ini, KETENGAH memulakan inisiatif menjalankan projek pemuliharaan pada 2006 dan menjinakkan kelah liar untuk dijadikan antara produk tarikan pelancongan yang utama di Tasik Kenyir.

“Pembangunan santuari kelah turut mendapat sokongan dan kerjasama kerajaan negeri dalam memastikan produk pelancongan ini terus berdaya saing dan berupaya

dimajukan kepada tahap yang lebih membanggakan,” katanya dalam kenyataan, semalam.

Santuari itu antara destinasi tumpuan utama pelancong ke Tasik Kenyir untuk merasai sendiri pengalaman bermandi-mandi bersama ikan kelah.

Tengku Ahmad Nadzri berkata, kejayaan itu hasil kerjasama dan usaha KETENGAH, kerajaan negeri dan penggiat pelancongan terutama Persatuan Pelancongan Tasik Kenyir dalam mempromosikan Tasik Kenyir sebagai antara destinasi pelancongan yang terulung di Malaysia.

BERNAMA



“Pembangunan santuari kelah turut mendapat sokongan dan kerjasama kerajaan negeri dalam memastikan produk ini terus berdaya saing”

Tengku Ahmad Nadzri Tengku Musa,
Pengurus Besar KETENGAH